



*Comme les enfans d'Israël célébrèrent la Pâques en la montagne de Sinai :  
 & comme la nuée estant sur le Tabernacle les conduisoit.*

**L**E Seigneur parla à Moïse au desert de Sinai, au premier mois de l'an second apres qu'ils furent sortis du pais d'Egypte, disant Les enfans d'Israël célébreront la Pâque en sa saison, le quatorzième iour de ce mois au Vespere Moïse commanda donc aux enfans d'Israël qu'ils celebrassent la Pâques, lesquels la célébrèrent en son temps le quatorzième iour dudit premier mois au Vespere, en la montagne de Sinai, & firent selon qu'il leur auoit esté commandé. Durant la celebration, la nuée de iour couuroit le Tabernacle & estoit sur la terre comme apparence de feu, depuis le soir iusques au matin ; & ainsi estoit fait continuellement. Et quand la nuée qui couuroit le Tabernacle s'éleuoit, lors les enfans d'Israël partoient ; & au lieu auquel s'arrestoit la nuée, là ils asseoient leur camp. Selon la parole du Seigneur ils cheminoient, & selon son commandement ils asseoient leur camp. Tous les iours esquels la nuée demouroit sur le Tabernacle, ils s'arrestoit au mesme lieu ; & s'il aduenoit qu'elle demeurast long-temps sur iceluy, les enfans d'Israël demouroient deuant le Seigneur, & ne se bougeoient point par tant de iours que la nuée estoit sur le Tabernacle. Si la nuée estoit depuis le Vespere iusques au matin, & qu'incontinent au poinct du iour elle laissast le Tabernacle, ils partoient, fust de iour ou de nuit. Selon la parole du Seigneur ils asseoient leur camp, & selon sa parole ils partoient & tenoient la garde aupres du Seigneur, suivant le mandement d'iceluy par l'entremise de Moïse. En l'an second, au second mois, au vingtième du mois la nuée s'esleua du Tabernacle, & les enfans d'Israël partirent selon leurs bandes du desert de Sinai, & la nuée s'arresta au desert de Pharan.